

Iamque fretum Minyae Pagasaeā puppe secābant,  
 perpetuāque trahēns inopem sub nocte senectam  
 Phīneus vīsus erat, iuvenēsque Aquilōne creatī  
 virgineās volucrēs miserī senis ōre fugārant,  
 5 multaue perpressī clārō sub Iāsonē tandem  
 contigerant rapidās līmōsī Phāsidos undās.  
 dumque adeunt rēgem Phrixēaque vellera poscunt  
 lēxque datur Minyīs magnōrum horrenda labōrum,  
 concipit intereā validōs Aeētiās ignēs  
 10 et luctāta diū, postquam ratiōne furōrem  
 vincere nōn poterat, ‘frūstrā, Mēdēa, repugnās:  
 nescio quis deus obstat,’ ait, ‘mīrumque, nisi hoc est,  
 aut aliquid certē simile huic, quod amāre vocātur.  
 nam cūr iussa patris nimium mihi dūra videntur?  
 15 sunt quoque dūra nimis! cūr, quem modo dēnique vīdī,  
 nē pereat, timeō? quae tantī causa timōris?  
 excute virgineō conceptās pectore flammās,  
 sī potes, infēlīx! sī possem, sānior essem!  
 sed trahit invītā nova vīs, aliudque cupīdō,  
 20 mēns aliud suādet: videō meliōra probōque,  
 dēteriōra sequor. quid in hospite, rēgia virgō,  
 ūreris et thalamōs aliēnī concipis orbis?  
 haec quoque terra potest, quod ames, dare. vīvat an ille  
 occidat, in dīs est. vīvat tamen! idque precārī  
 25 vel sine amōre licet: quid enim commīsīt Iāsōn?

quem, nisi crūdēlem, nōn tangat Iāsonis aetās  
 et genus et virtūs? quem nōn, ut cētera dēsint,  
 ōre movēre potest? certē mea pectora mōvit.  
 at nisi opem tulerō, taurōrum adflābitur ōre  
 30 concurretque suae segetī, tellūre creatīs  
 hostībūs, aut avidō dabitur fēra praeda dracōnī.  
 hoc ego sī patiar, tum mē dē tigride nātam,  
 tum ferrum et scopulōs gestāre in corde fatēbor!  
 cūr nōn et spectō pereuntem oculōsque videndō  
 35 cōnscelerō? cūr nōn taurōs exhortor in illum  
 terrigenāsque ferōs īnsōpītumque dracōnem?  
 dī meliōra velint! quamquam nōn ista precanda,  
 sed faciēda mihī.—prōdamne ego rēgna parentis,  
 atque ope nescio quis servābitur advena nostrā,  
 40 ut per mē sospes sine mē det lintea ventīs  
 virque sit alterius, poenae Mēdēa relinquer?  
 sī facere hoc aliamve potest praepōnere nōbīs,  
 occidat ingrātus! sed nōn is vultus in illō,  
 nōn ea nōbilitās animō est, ea grātia fōrmae,  
 45 ut timeam fraudem meritique oblīvia nostrī.  
 et dabit ante fidem, cōgamque in foedera testēs  
 esse deōs. quid tūta timēs? accingere et omnem  
 pelle moram: tibi sē semper dēbēbit Iāsōn,  
 tē face sollemnī iunget sibi perque Pelasgās  
 50 servātrīx urbēs mātrem celebrābere turbā.

ergō ego germānam frātre[m]que patrē[m]que deōsque  
 et nātāle solum ventīs ablāta relinquam?  
 nempe pater saevus, nempe est mea barbara tellūs,  
 frāter adhūc infāns; stant mēcum vōta sorōris,  
 55 maximus intrā mē deus est! nōn magna relinquam,  
 magna sequar: titulum servātae pūbis Achīvae  
 nōtitiamque solī meliōris et oppida, quōrum  
 hīc quoque fāma viget, cultūsque artēsque locōrum,  
 quemque ego cum rēbus, quās tōtus possidet orbis,  
 60 Aesonidēn mūtāsse velim, quō coniuge fēlīx  
 et dīs cārā ferar et vertice sīdera tangam.  
 quid, quod nescio quī mediīs concurrere in undīs  
 dīcuntur montēs ratibusque inimīca Charybdis  
 nunc sorbēre fretum, nunc reddere, cīnctaue saevīs  
 65 Scylla rapāx canibus Siculō lātrāre profundō?  
 nempe tenēns, quod amō, gremiōque in Iāsonis haerēns  
 per freta longa ferar; nihil illum amplexa verēbor  
 aut, sīquid metuam, metuam dē coniuge sōlō.—  
 coniugiumne putās speciōsaue nōmina culpae  
 70 inpōnis, Mēdēa, tuae?—quīn adspice, quantum  
 adgrediāre nefās, et, dum licet, effuge crīmen!’  
 dīxit, et ante oculōs rēctum pietāsque pudorque  
 cōnstitērant, et victa dabat iam terga Cupīdō.  
 Ībat ad antīquās Hecatēs Perseidos arās,  
 75 quās nemus umbrōsum sēcrētaue silva tegēbat,

et iam fortis erat, pulsusque recesserat ârdor,  
 cum videt Aesonidên exstinctaque flamma relûxit.  
 êrubuêre genae, tōtōque recanduit ôre,  
 utque solet ventīs alimenta adsûmere, quaeque  
 80 parva sub inductâ latuit scintilla favillâ  
 crêscere et in veterês agitâta resurgere vîrês,  
 sîc iam lēnis amor, iam quem languêre putârês,  
 ut vîdit iuvenem, speciê praesentis inârsit.  
 et cāsū solitō fôrmôsior Aesone nātus  
 85 illâ lûce fuit: possês ignôscere amanti.  
 spectat et in vultū velutî tum dēnique vîsō  
 lūmina fîxa tenet nec sē mortālîa dēmēns  
 ôra vidêre putat nec sē dēclînat ab illō;  
 ut vērō coepitque loquî dextramque prehendit  
 90 hospes et auxilium submissâ vōce rogâvit  
 prômîsitque torum, lacrimîs ait illa profûsîs:  
 ‘quid faciam, videō: nec mē ignôrantia vērî  
 dēcipiet, sed amor. servâbere mûnere nostrō,  
 servātus prômissa datō!’ per sacra trifôrmis  
 95 ille deae lûcōque foret quod nūmen in illō  
 perque patrem socerî cernentem cūncta futūrî  
 êventûsque suôs et tanta perîcula iûrat:  
 crêditus accēpit cantâtâs prôtinus herbâs  
 êdidicitque ūsum laetusque in tēcta recessit.  
 100     Postera dēpulerat stēllâs Aurōra micantês:

conveniunt populī sacrum Māvortis in arvum  
 cōsistuntque iugīs; mediō rēx ipse resēdit  
 agmine purpureus scēptrōque īsignis eburnō.  
 ecce adamantēis Vulcānum nāribus efflant  
 105 aeripedēs taurī, tāctaeque vapōribus herbae  
 ārdent, utque solent plēnī resonāre camīnī,  
 aut ubi terrēnā silicēs fornāce solūtī  
 concipiunt ignem liquidārum adspergine aquārum,  
 pectora sīc intus clausās volventia flammās  
 110 gutturaque usta sonant; tamen illīs Aesone nātus  
 obvius it. vertēre trucēs venientis ad ōrā  
 terribilēs vultūs praefīxaque cornua ferrō  
 pulvereumque solum pede pulsāvēre bisulcō  
 fūmificīsque locum mūgītibus inplēvērunt.  
 115 dēriguēre metū Minyae; subit ille nec ignēs  
 sentit anhelātōs (tantum medicāmina possunt!)  
 pendulaque audācī mulcet paleāria dextra  
 suppositōsque iugō pondus grave cōgit arātrī  
 dūcere et īnsuētum ferrō prōscindere campum:  
 120 mīrantur Colchī, Minyae clāmōribus augent  
 adiciuntque animōs. galea tum sūmit aēna  
 vīpereōs dentēs et arātōs spargit in agrōs.  
 sēmina mollit humus validō praetīncta venēnō,  
 et crēscunt fiuntque satī nova corpora dentēs,  
 125 utque hominis speciem mātērnā sūmit in alvō

perque suōs intus numerōs conpōnitur infāns  
 nec nisi mātūrus commūnēs exit in aurās,  
 sīc, ubi vīsceribus gravidae tellūris imāgō  
 effecta est hominis, fētō cōnsurgit in arvō,  
 130 quodque magis mīrum est, simul ēdita concutit arma.  
 quōs ubi vīdērunt praeacūtae cuspidis hastās  
 in caput Haemoniī iuvenis torquēre parantīs,  
 dēmīsere metū vultumque animumque Pelasgī;  
 ipsa quoque extimuit, quae tūtum fēcerat illum.  
 135 utque petī vīdit iuvenem tot ab hostibus ūnum,  
 palluit et subitō sine sanguine frīgida sēdit,  
 nēve parum valeant ā sē data grāmina, carmen  
 auxiliāre canit sēcētāsque advocat artēs.  
 ille gravem mediōs silicem iaculātus in hostēs  
 140 ā sē dēpulsum Mārtem convertit in ipsōs:  
 terrigenae pereunt per mūtua vulnera frātrēs  
 cīvīlīque cadunt aciē. grātantur Achīvī  
 victōremque tenent avidīsque amplexibus haerent.  
 tū quoque victōrem conplectī, barbarā, vellēs:  
 145 obstitit inceptō pudor, at complexa fuissēs,  
 sed tē, nē facerēs, tenuit reverentia fāmae.  
 quod licet, adfectū tacitō laetāris agisque  
 carminibus grātēs et dīs auctōribus hōrum.  
 Pervigilem superest herbīs sōpīre dracōnem,  
 150 quī cristā linguīsque tribus praesignis et uncīs

dentibus horrendus cūstōs erat arboris aureae.  
 hunc postquam sparsit Lēthaeī grāmine sūcī  
 verbaque ter dīxit placidōs facientia somnōs,  
 quae mare turbātum, quae concita flūmina sistunt,  
 155 somnus in ignōtōs oculōs sibi vēnit, et aurō  
 hērōs Aesonius potitur spoliōque superbus  
 mūneris auctōrem sēcum, spoliā altera, portāns  
 victor Iōlciacōs tetigit cum coniuge portūs.  
 Haemoniae mātērēs prō gnātīs dōna receptīs  
 160 grandaevīque ferunt patrēs congestaque flamma  
 tūra liquefaciunt, inductāque cornibus aurum  
 victima vōta cadit, sed abest grātantibus Aesōn  
 iam propior lētō fessusque senīlibus annīs,  
 cum sīc Aesonidēs: ‘ō cui dēbēre salūtem  
 165 cōnfiteor, coniūnx, quamquam mihi cūncta dedistī  
 excessitque fidem meritōrum summa tuōrum,  
 sī tamen hoc possunt (quid enim nōn carmina possunt?)  
 dēme meīs annīs et dēemptōs adde parentī!’  
 nec tenuit lacrimās: mōta est pietāte rogantis,  
 170 dissimilemque animum subiit Aeēta relictus;  
 nec tamen adfectus tālis cōnfessa ‘quod’ inquit  
 ‘excidit ōre tuō, coniūnx, scelus? ergō ego cuīquam  
 posse tuae videor spatium trānscribere vītāe?  
 nec sinat hoc Hecatē, nec tū petis aequa; sed istō,  
 175 quod petis, experiar maius dare mūnus, Iāsōn.

arte meā socerī longum temptābimus aevum,  
nōn annīs revocāre tuīs, modo dīva trifōrmis  
adiuvet et praesēns ingentibus adnuat ausīs.’

Trēs aberant noctēs, ut cornua tōta coīrent  
180 efficerentque orbem; postquam plēnissima fulsit  
ac solidā terrās spectāvit imāgine lūna,  
ēgreditur tēctīs vestēs indūta recīntās,  
nūda pedem, nūdōs umerīs infūsa capillōs,  
fertque vagōs mediae per mūta silentia noctis  
185 incommitāta gradūs: hominēs volucrēsque ferāsque  
solverat alta quiēs, nūllō cum murmure saepēs,  
inmōtaeque silent frondēs, silet ūmidus āēr,  
sīdera sōla micant: ad quae sua brachia tendēns  
ter sē convertit, ter sūmptīs flūmine crīnem  
190 inrōrāvit aquīs ternīsque ululātibus ōra  
solvit et in dūrā submissō poplite terra  
‘Nox’ ait ‘arcānīs fīdissima, quaeque diurnīs  
aurea cum lūnā succēditis ignibus astra,  
tūque, triceps Hecatē, quae coeptīs cōnscia nostrīs  
195 adiūtrīxque venīs cantūsque artisque magōrum,  
quaeque magōs, Tellūs, pollentibus instruis herbīs,  
auraeque et ventī montēsque amnēsque lacūsque,  
dīque omnēs nemorum, dīque omnēs noctis adeste,  
quōrum ope, cum voluī, rīpīs mīrantibus amnēs  
200 in fontēs rediēre suōs, concussaue sistō,



stantia concutiō cantū freta, nūbila pellō  
 nūbilaque indūcō, ventōs abigōque vocōque,  
 vīpereās rumpō verbīs et carmine faucēs,  
 vīvaque saxa suā convulsaque rōbora terrā  
 205 et silvās moveō iubeōque tremēscere montīs  
 et mūgīre solum mānēsque exīre sepulcrīs!  
 tē quoque, Lūna, trahō, quamvīs Temesaea labōrēs  
 aera tuōs minuant; currūs quoque carmine nostrō  
 pallet avī, pallet nostrīs Aurōra venēnīs!  
 210 vōs mihi taurōrum flammās hebetāstis et uncō  
 inpatiēns oneris collum pressistis arātrō,  
 vōs serpentigenīs in sē fera bella dedistis  
 cūstōdemque rudem somnī sōpīstis et aurum  
 vindice dēceptō Grāiās mīsistis in urbēs:  
 215 nunc opus est sūcīs, per quōs renovāta senectūs  
 in flōrem redeat prīmōsque recolligat annōs,  
 et dabitis. neque enim micuērunt sīdera frūstrā,  
 nec frūstrā volucrum tractus cervīce dracōnum  
 currus adest. ’aderat dēmissus ab aethere currūs.  
 220 quō simul adscendit frēnātaque colla dracōnum  
 permulsit manibusque levēs agitāvit habēnās,  
 sublīmis rapitur subiectaque Thessala Tempe  
 dēspicit et certīs regiōnibus adplicat anguēs:  
 et quās Ossa tulit, quās altum Pēliōn herbās,  
 225 Othrysque Pindusque et Pindō maior Olympus,

perspicit et placitās partim rādīce revellit,  
 partim succīdit curvāmine falcis aēnae.  
 multa quoque Āpidanī placuērunt grāmina rīpīs,  
 multa quoque Amphrȳsī, neque erās inmūnis, Enīpeu;  
 230 nec nōn Pēnēōs nec nōn Sperchēidēs undae  
 contribuēre aliquid iuncōsaque lītora Boebēs;  
 carpsit et Euboicā vīvāx Anthēdone grāmen,  
 nōndum mūtātō vulgātum corpore Glaucī.  
 Et iam nōna diēs currū pennīsque dracōnum  
 235 nōnaque nox omnēs lūstrantem vīderat agrōs,  
 cum rediit; neque erant tāctī nisi odōre dracōnēs,  
 et tamen annōsae pellem posuēre senectae.  
 cōnstitit adveniēns citrā līmenque forēsque  
 et tantum caelō tegitur refugitque virilēs  
 240 contāctūs, statuitque ārās dē caespite bīnās,  
 dexteriōre Hecatēs, ast laevā parte Iuventae.  
 hās ubi verbēnīs silvāque incīnxit agrestī,  
 haud procul ēgestā scrobibus tellūre duābus  
 sacra facit cultrōsque in guttura velleris ātrī  
 245 conicit et patulās perfundit sanguine fossās;  
 tum super invergēns liquidī carchēsia mellis  
 alteraque invergēns tepidī carchēsia lactis,  
 verba simul fūdit terrēnaque nūmina cīvī  
 umbrārumque rogat raptā cum coniuge rēgem,  
 250 nē properent artūs animā fraudāre senilī.

Quōs ubi plācāvit precibusque et murmure longō,  
 Aesonis effētum prōferrī corpus ad aurās  
 iussit et in plēnōs resolūtum carmine somnōs  
 exanimī similem strātīs porrēxit in herbīs.  
 255 hinc procul Aesonidēn, procul hinc iubet ire ministrōs  
 et monet arcānīs oculōs removēre profānōs.  
 diffugiunt iussī; passīs Mēdēa capillīs  
 bacchantum rītū flagrantīs circuit ārās  
 multifidāsque facēs in fossā sanguinis ātra  
 260 tinguit et infectās geminīs accendit in ārīs  
 terque senem flammā, ter aquā, ter sulphure lūstrat.  
 Intereā validum positō medicāmen aēnō  
 fervet et exsultat spūmīsque tumentibus albet.  
 illīc Haemoniā rādīcēs valle resectās  
 265 sēminaque flōrēsque et sūcōs incoquit ātrōs;  
 adicit extrēmō lapidēs Oriente petītōs  
 et quās Ōceanī refluxum mare lāvit harēnās;  
 addit et exceptās lūnā pernocte pruīnās  
 et strīgīs infāmīs ipsīs cum carnibus ālās  
 270 inque virum solitī vultūs mūtāre ferīnōs  
 ambiguī prōsecta lupī; nec dēfuit illīs  
 squāmea Cīnyphiī tenuis membrāna chelydrī  
 vīvācisque iecur cervī; quibus insuper addit  
 ōva caputque novem cornīcis saecula passae.  
 275 hīs et mīlle aliīs postquam sine nōmine rēbus

prōpositum īnstrūxit mortālī barbara maius,  
 ārentī rāmō iamprīdem mītis olīvāe  
 omnia cōnfūdit summīsque inmiscuit īma.  
 ecce vetus calidō versātus stīpes aēnō  
 280 fit viridis prīmō nec longō tempore frondēs  
 induit et subitō gravidīs onerātur olīvīs:  
 at quācumque cavō spūmās ēiēcit aēnō  
 ignis et in terram guttae cecidēre calentēs,  
 vernat humus, flōrēsque et mollia pābula surgunt.  
 285 quae simul ac vīdit, strictō Mēdēa reclūdit  
 ēnse senis iugulum veteremque exīre cruōrem  
 passa replet sūcīs; quōs postquam conbibit Aesōn  
 aut ōre acceptōs aut vulnere, barba comaeque  
 cānitiē positā nigrum rapuēre colōrem,  
 290 pulsa fugit maciēs, abeunt pallorque situsque,  
 adiectōque cavae supplentur corpore rūgae,  
 membraque luxuriant: Aesōn mīrātur et ōlim  
 ante quater dēnōs hunc sē reminīscitur annōs.  
 Vīderat ex altō tantī mīrācula mōnstrī  
 295 Līber et admonitus, iuvenēs nūtrīcibus annōs  
 posse suīs reddī, capit hoc ā Colchide mūnus.  
 Nēve dolī cessent, odium cum coniuge falsum  
 Phāsias adsimulat Peliaeque ad līmina supplex  
 cōnfugit; atque illam, quoniam gravis ipse senecta est,  
 300 excipiunt nātae; quās tempore callida parvō

Colchis amīctiae mendācis imāgine cēpit,  
 dumque refert inter meritōrum maxima dēmtōs  
 Aesonis esse situs atque hāc in parte morātur,  
 spēs est virginibus Peliā subiecta creātis,  
 305 arte suum parilī revirēscere posse parentem,  
 idque petunt pretiumque iubent sine fine paciscī.  
 illa brevī spatiō silet et dubitāre vidētur  
 suspenditque animōs fictā gravitāte rogantum.  
 mox ubi pollicita est, 'quō sit fidūcia maior  
 310 mūneris huius' ait, 'quī vestrī maximus aevō est  
 dux gregis inter ovēs, agnus medicāmine fiet.'  
 prōtinus innumerīs effētus lāniger annīs  
 attrahitur flexō circum cava tempora cornū;  
 cuius ut Haemoniō marcentia guttura cultrō  
 315 fōdit et exiguō maculāvit sanguine ferrum,  
 membra simul pecudīs validōsque venēfica sūcōs  
 mergit in aere cavō: minuunt ea corporis artūs  
 cornuaque exūrunť nec nōn cum cornibus annōs,  
 et tener audītur mediō bālātus aēnō:  
 320 nec mora, bālātum mīrantibus exsilit agnus  
 lascīvitque fugā lactantiaque ūbera quaerit.  
 Obstipuēre satae Peliā, prōmissaque postquam  
 exhibuēre fidem, tum vērō inpēnsius īstant.  
 ter iuga Phoebus equīs in Hibērō flūmine mersīs  
 325 dēmpserat et quārtā radiantia nocte micābant

sīdera, cum rapidō fallāx Aeētiās ignī  
 impōnit pūrum laticem et sine vīribus herbās.  
 iamque necī similis resolūtō corpore rēgem  
 et cum rēge suō cūstōdēs somnus habēbat,  
 330 quem dederant cantūs magicaeque potentia linguae;  
 intrārant iussae cum Colchide līmina nātae  
 ambierantque torum: ‘quid nunc dubitātis inertēs?  
 stringite’ ait ‘gladiōs veteremque haurīte crurōrem,  
 ut repleam vacuās iuvenālī sanguine vēnās!  
 335 in manibus vestrīs vīta est aetāsque parentis:  
 sī pietās ūlla est nec spēs agitātis inānīs,  
 officium praestāte patrī tēlīsque senectam  
 exigite, et saniem coniectō ēmittite ferrō!’  
 hīs, ut quaeque pia est, hortātibus in pia prīma est  
 340 et, nē sit scelerāta, facit scelus: haud tamen ictus  
 ūlla suōs spectāre potest, oculōsque reflectunt,  
 caecaque dant saevīs āversae vulnera dextrīs.  
 ille cruōre fluēns, cubitō tamen adlevat artūs,  
 sēmilacerque torō temptat cōnsurgere, et inter  
 345 tot medius gladiōs pallentia bracchia tendēns  
 ‘quid facitis, gnātae? quid vōs in fāta parentis  
 armat?’ ait: cecidēre illīs animīque manūsque;  
 plūra locūtūrō cum verbīs guttura Colchīs  
 abstulit et calidīs laniātum mersit in undīs.  
 350 Quod nisi pennātīs serpentibus īsset in aurās,

nōn exēmp̄ta foret poenae: fugit alta superque  
 Pēliōn umbrōsum, Philyrēia tēcta, superque  
 Othryn et ēventū veteris loca nōta Cerambī:  
 hīc ope nymphārum sublātus in āera pennīs,  
 355 cum gravis īnfūsō tellūs foret obruta pontō,  
 Deucaliōnēās effūgit inobrutus undās.  
 Aeoliam Pitanēn ā laevā parte relinquit  
 factaque dē saxō longī simulācra dracōnis  
 Īdaeumque nemus, quō nātī fūrta, iuencum,  
 360 occuluit Līber falsī sub imāgine cervī,  
 quāque pater Corythī parvā tumulātus harēnā est,  
 et quōs Maera novō lātrātū terruit agrōs,  
 Eurypylīque urbem, quā Cōae cornua matrēs  
 gessērunt tum, cum discēderet Herculis agmen,  
 365 Phoebeāque Rhodōn et Iālysiōs Telchīnās,  
 quōrum oculōs ipsō vitiantēs omnia vīsū  
 Iuppiter exōsus frāternīs subdidit undīs;  
 trānsit et antīquae Carthēia moenia Cēae,  
 quā pater Alcīdamās placidam dē corpore nātae  
 370 mīrātūrus erat nāscī potuisse columbam.  
 inde lacūs Hyriēs videt et Cŷcnēia Tempe,  
 quae subitus celebrāvit olor: nam Phŷlius illic  
 imperiō puerī volucrisque ferumque leōnem  
 trādiderat domitōs; taurum quoque vincere iussus  
 375 vīcerat et sprētō totiēns īrātus amōre

praemia poscentī taurum suprēma negābat;  
 ille indignātus ‘cupiēs dare’ dīxit et altō  
 dēsiluit saxō; cūnctī cecidisse putābant:  
 factus olor niveīs pendēbat in āere pennīs;  
 380 at genetrīx Hyriē, servātī nescia, flendō  
 dēlicuit stāgnumque suō dē nōmine fēcit.  
 adiacet hīs Pleurōn, in quā trepidantibus ālis  
 Ōphias effūgit nātōrum vulnera Combē;  
 inde Calaurēae Lētōidos adspicit arva  
 385 in volucrem versī cum coniuge cōnschia rēgis.  
 dextera Cyllēne est, in quā cum mātē Menēphrōn  
 concubitūrus erat saevārum mōre ferārū;  
 Cēphīsōn procul hinc dēflentem fāta nepōtis  
 respicit in tumidam phōcēn ab Apolline versī  
 390 Eumēlīque domum lūgentis in āere nātum.  
 Tandem vīpereīs Ephyrēn Pīrēnida pennīs  
 contigit: hīc aevō veterēs mortālia prīmō  
 corpora vulgārunt pluviālibus ēdita fungīs.  
 sed postquam Colchīs ārsit nova nūpta venēnīs  
 395 flagrantemque domum rēgis mare vīdit utrumque,  
 sanguine nātōrum perfunditur inpius ēnsis,  
 ultaque sē male mātē Iāsonis effugit arma.  
 hinc Tītānīacīs ablāta dracōnibus intrat  
 Palladiās arcēs, quae tē, iūstissima Phēne,  
 400 tēque, senex Periphā, pariter vīdēre volantēs



innīxamque novīs neptem Polypēmonis ālīs.  
excipit hanc Aegeus factō damnandus in ūnō,  
nec satis hospitium est, thalamī quoque foedere iungit.

Iamque aderat Thēseus, prōlēs ignāra parentī,  
405 quī virtūte suā bimarem pācāverat Isthmōn:  
huius in exitium miscet Mēdēa, quod ōlim  
attulerat sēcum Scythicīs aconītōn ab ōrīs.  
illud Echidnaeae memorant ē dentibus ortum  
esse canis: specus est tenebrōsō caecus hiātū,  
410 est via dēclīvis, per quam Tīrynthius hērōs  
restantem contrāque diem radiōsque micantēs  
oblīquantem oculōs nexīs adamante catēnīs  
Cerberōn abstrāxit, rabida quī concitus īra  
inplēvit pariter ternīs lātrātibus aurās  
415 et sparsit viridēs spūmīs albentibus agrōs;  
hās concrēsse putant nactāsque alimenta ferācis  
fēcundīque solī vīrēs cēpisse nocendī;  
quae quia nāscuntur dūrā vīvācia cautē,  
agrestēs aconīta vocant. ea coniugis āstū  
420 ipse parēns Aegeus nātō porrēxit ut hostī.  
sūmpserat ignārā Thēseus data pōcula dextra,  
cum pater in capulō gladiī cognōvit eburnō  
signa suī generis facinusque excussit ab ōre.  
effugit illa necem nebulīs per carmina mōtīs;  
425 At genitor, quamquam laetātur sospite nātō,

attonitus tamen est, ingēns discrīmine parvō  
 committī potuisse nefās: fōvet ignibus ārās  
 mūneribusque deōs inplet, feriuntque secūrēs  
 colla torōsa boum vīnctōrum cornua vittīs.  
 430 nūllus Erechthīdīs fertur celebrātior illō  
 inlūxisse diēs: agitant convīvia patrēs  
 et medium vulgus nec nōn et carmina vīnō  
 ingenium faciente canunt: ‘tē, maxime Thēseu,  
 mīrāta est Marathōn Crētaei sanguine taurī,  
 435 quodque suīs sēcūrus arat Cromyōna colōnus,  
 mūnus opusque tuum est; tellūs Epidauria per tē  
 clāvigeram vīdit Vulcānī occumbere prōlem,  
 vīdit et inmītem Cēphīsias ōra Procrūstēn,  
 Cercyonis lētum vīdit Cereālis Eleusīn.  
 440 occidit ille Sinis magnīs male vīribus ūsus,  
 quī poterat curvāre trabēs et agēbat ab altō  
 ad terram lātē sparsūrās corpora pīnūs.  
 tūtus ad Alcathoēn, Lelegēia moenia, līmes  
 compositō Scīrōne patet, sparsīsque latrōnis  
 445 terra negat sēdem, sēdem negat ossibus undā;  
 quae iactāta diū fertur dūrāsse vetustās  
 in scopulōs: scopulīs nōmen Scīrōnis inhaeret.  
 sī titulōs annōsque tuōs numerāre velimus,  
 facta prement annōs. prō tē, fortissime, vōta  
 450 pūblica suscipimus, Bacchī tibi sūmimus haustūs.’

cōnsonat adsēnsū populī precibusque faventum  
rēgia, nec tōtā trīstis locus ūllus in urbe est.

Nec tamen (usque adeō nūlla est sincēra voluptās,  
sollicitumque aliquid laetīs intervenit) Aegeus

455 gaudia percēpit nātō sēcūra receptō:  
bella parat Mīnōs; quī quamquam mīlite, quamquam  
classe valet, patriā tamen est firmissimus īra  
Androgeīque necem iūstīs ulcīscitur armīs.  
ante tamen bellō vīrēs adquīrit amīcās,

460 quāque potēns habitus volucrī freta classe pererrat:  
hinc Anaphēn sibi iungit et Astypalēia rēgna,  
(prōmissīs Anaphēn, rēgna Astypalēia bellō);  
hinc humilem Myconōn crētōsaque rūra Cimōlī  
flōrentemque thymō Syron plānamque Serīphōn  
465 marmoreamque Parōn, quamque inopia prōdidit Arnē  
Siphnōn et acceptō, quod avāra poposcerat, aurō  
mūtātā est in avem, quae nunc quoque diligit aurum,  
nigra pedēs, nigrīs vėlāta monēdula pennīs.

At nōn Ōliaros Didymēque et Tēnos et Andros  
470 et Gyros nitidaeque ferāx Peparēthōs olīvae  
Cnōsiacās iūvēre ratēs; latere inde sinistrō  
Oenopiam Mīnōs petit, Aeacidēia rēgna:  
Oenopiam veterēs adpellāvēre, sed ipse  
Aeacus Aegīnam genetrīcis nōmine dīxit.  
475 turba ruit tantaeque virum cognōscere fāmae

expetit; occurrunt illī Telamōnque minorque  
 quam Telamōn Pēleus et prōlēs tertia Phōcus;  
 ipse quoque ēgreditur tardus gravitāte senīlī  
 Aeacus et, quae sit veniendī causa, requīrit.  
 480 admonitūs patriī lūctus suspīrat et illī  
 dicta refert rēctor populōrum tālia centum:  
 ‘arma iuvēs ōrō prō gnātō sūmpta piaeque  
 pars sīs mīlitiae; tumulō sōlācia poscō.’  
 huic Āsōpiadēs ‘petis inrita’ dīxit ‘et urbī  
 485 nōn faciēda meae; neque enim coniūntior ūlla  
 Cēcropidīs est hāc tellūs: ea foedera nōbīs.’  
 trīstis abīt ‘stābunt’ quae ‘tibī tua foedera magnō’  
 dīxit et ūtilius bellum putat esse minārī  
 quam gerere atque suās ibi praecōnsūmere vīrēs.  
 490 classis ab Oenopiīs etiamnum Lyctia mūrīs  
 spectārī poterat, cum plēnō concita vēlō  
 Attica puppis adest in portusque intrat amīcōs,  
 quae Cephalum patriaeque simul mandāta ferēbat.  
 Aeacidāe longō iuvenēs post tempore vīsum  
 495 agnōvēre tamen Cephalum dextrāsque dedēre  
 inque patris dūxēre domum: spectābilis hērōs  
 et veteris retinēns etiamnum pignora fōrmae  
 ingreditur rāmumque tenēns populāris olīvae  
 ā dextrā laevāque duōs aetāte minōrēs  
 500 maior habet, Clytōn et Būtēn, Pallante creatōs.

Postquam congressūs prīmī sua verba tulērunt,  
 Cēcropidae Cephalus peragit mandāta rogatque  
 auxilium foedusque refert et iūra parentum,  
 imperiumque petī tōtīus Achāidos addit.  
 505 sīc ubi mandātam iūvit fācundia causam,  
 Aeacus, in capulō scēptrī nītente sinistrā,  
 ‘nē petite auxilium, sed sūmite’ dīxit, ‘Athēnae,  
 nec dubiē vīrēs, quās haec habet īnsula, vestrās  
 dūcite, et (ō maneat rērum status iste meārum!)  
 510 rōbora nōn dēsunt; superat mihi mīles et hoc est,  
 grātia dīs, fēlīx et inexcūsābile tempus.’  
 ‘immō ita sit’ Cephalus, ‘crēscat tua cīvibus optō  
 urbs’ ait; ‘adveniēns equidem modo gaudia cēpī,  
 cum tam pulchra mihī, tam pār aetāte iuventūs  
 515 obvia prōcessit; multōs tamen inde requīrō,  
 quōs quondam vīdī vestrā prius urbe receptus.’  
 Aeacus ingemuit trīstīque ita vōce locūtus:  
 ‘flēbile prīncipium melior fortūna secūta est;  
 hanc utinam possem vōbīs memorāre sine illō!  
 520 ōrdine nunc repetam, neu longā ambāge morer vōs,  
 ossa cinisque iacent, memorī quōs mente requīris,  
 et quota pars illī rērum periēre meārum!  
 dīra luēs īrā populīs Iūnōnis inīquae  
 incidit exōsae dictās ā paelice terrās.  
 525 dum vīsum mortāle malum tantaeque latēbat

causa nocēns clādis, pugnātum est arte medendī:  
 exitium superābat opem, quae victa iacēbat.  
 prīncipiō caelum spissā cālīgine terrās  
 pressit et ignāvōs inclūsit nūbibus aestus;  
 530 dumque quater iūctīs explēvit cornibus orbem  
 Lūna, quater plēnum tenuāta retexuit orbem,  
 lētifērīs calidī spīrārunt aestibus austrī.  
 cōnstat et in fontis vitium vēnisse lacusque,  
 mīliaque incultōs serpentum multa per agrōs  
 535 errāsse atque suīs fluviōs temerāsse venēnīs.  
 strāge canum prīmō volucrumque oviumque boumque  
 inque ferīs subitī dēprēnsa potentia morbī.  
 concidere infēlīx validōs mīrātur arātor  
 inter opus taurōs mediōque recumbere sulcō;  
 540 lānigerīs gregibus bālātūs dantibus aegrōs  
 sponte suā lānaeque cadunt et corpora tābent;  
 ācer equus quondam magnaеque in pulvere fāmae  
 dēgenerat palmās veterumque oblītus honōrum  
 ad praesēpe gemit lētō moritūrus inertī.  
 545 nōn aper irāscī meminit, nōn fīdere cursū  
 cerva nec armentīs incurrere fortibus ursī.  
 omnia languor habet: silvīsque agrīsque viīsque  
 corpora foeda iacent, vitiantur odōribus aurae.  
 mīra loquar: nōn illa canēs avidaeque volucrēs,  
 550 nōn cānī tetigēre lupī; dīlāpsa liquēscunt

adflātūque nocent et agunt contāgia lātē.

‘Pervenit ad miserōs damnō graviōre colōnōs  
pestis et in magnae dominātur moenibus urbis.  
vīscera torrentur prīmō, flammaeque latentis  
555 indicium rubor est et ductus anhēlitus; ignī  
aspera lingua tumet, tepidīsque ārentia ventīs  
ōra patent, auraeque gravēs captantur hiātū.  
nōn strātum, nōn ūlla patī vėlāmina possunt,  
nūda sed in terrā pōnunt praecordia, nec fit  
560 corpus humō gelidum, sed humus dē corpore fervet.  
nec moderātor adest, inque ipsōs saeva medentēs  
ērumpit clādēs, obsuntque auctōribus artēs;  
quō propior quisque est servitque fidēlius aegrō,  
in partem lētī citius venit, utque salūtis  
565 spēs abiit finemque vident in fūnere morbī,  
indulgent animīs et nūlla, quid ūtile, cūra est:  
ūtile enim nihil est. passim positōque pudōre  
fontibus et fluvīis puteīsque capācibus haerent,  
nec sitis est exstīncta prius quam vīta bibendō.  
570 inde gravēs multī nequeunt cōnsurgere et ipsīs  
inmoriuntur aquīs, aliquis tamen haurit et illās;  
tantaque sunt miserīs invīsī taedia lectī,  
prōsiliunt aut, sī prohibent cōsistere vīrēs,  
corpora dēvolvunt in humum fugiuntque penātēs  
575 quisque suōs, sua cuique domus fūnesta vidētur,

et quia causa latet, locus est in crīmine; partim  
 sēmianimēs errāre viīs, dum stāre valēbant,  
 adspicerēs, flentēs aliōs terrāque iacentēs  
 lassaque versantēs suprēmō lūmina mōtū;  
 580 membraque pendentīs tendunt ad sīdera caelī,  
 hīc illīc, ubi mors dēprēnderat, exhālantēs.  
 ‘Quid mihi tunc animī fuit? an, quod dēbuit esse,  
 ut vītā ōdissem et cuperem pars esse meōrum?  
 quō sē cumque aciēs oculōrum flexerat, illīc  
 585 vulgus erat strātum, velutī cum putria mōtīs  
 pōma cadunt rāmīs agitātāque īlice glandēs.  
 templa vidēs contrā gradibus sublīmia longīs:  
 Iuppiter illa tenet. quis nōn altāribus illīs  
 inrita tūra dedit? quotiēns prō coniuge coniūnx,  
 590 prō gnātō genitor dum verba precantia dīcit,  
 nōn exōrātīs animam finīvit in ārīs,  
 inque manū tūris pars incōnsūmpta reperta est!  
 admōtī quotiēns templīs, dum vōta sacerdos  
 concipit et fundit dūrum inter cornua vīnum,  
 595 haud exspectātō cecidērunt vulnere taurī!  
 ipse ego sacra Iovī prō mē patriāque tribusque  
 cum facerem nātīs, mūgītūs victima dīrōs  
 ēdidit et subitō conlāpsa sine ictibus ūllīs  
 exiguō tīnxit subiectōs sanguine cultrōs.  
 600 exta quoque aegra notās vērī monitūsque deōrum



perdiderant: trīstēs penetrant ad vīscera morbī.  
 ante sacrōs vīdī prōiecta cadāvera postēs,  
 ante ipsās, quō mors foret invidiōsior, ārās.  
 pars animam laqueō claudunt mortisque timōrem  
 605 morte fugant ultrōque vocant venientia fāta.  
 corpora missa necī nūllīs dē mōre feruntur  
 fūneribus (neque enim capiēbant fūnera portae):  
 aut inhumāta premunt terrās aut dantur in altōs  
 indōtāta rogōs; et iam reverentia nūlla est,  
 610 dēque rogīs pugnant aliēnīsque ignibus ārdent.  
 quī lacrimant, dēsunt, indēflētaeque vagantur  
 nātōrumque patrumque animae iuvenumque senumque,  
 nec locus in tumultōs, nec sufficit arbor in ignēs.  
 Attonitus tantō miserārum turbine rērum,  
 615 “Iuppiter ō!” dīxī, “sī tē nōn falsa loquuntur  
 dicta sub amplexūs Aegīnae Āsōpidos īsse,  
 nec tē, magne pater, nostrī pudet esse parentem,  
 aut mihi redde meōs aut mē quoque conde sepulcrō!”  
 ille notam fulgōre dedit tonitrūque secundō.  
 620 “accipiō sintque ista precor fēlīcia mentīs  
 signa tuae!” dīxī, “quod dās mihi, pigneror ōmen.”  
 forte fuit iuxtā patulīs rārissima rāmīs  
 sacra Iovī quercus dē sēmine Dōdōnaeō;  
 hīc nōs frūgilegās adspeximus agmine longō  
 625 grande onus exiguō formīcās ōre gerentēs

rūgōsōque suum servantēs cortice callem;  
 dum numerum mīror, “totidem, pater optime,” dīxī,  
 “tū mihi dā cīvēs et inānia moenia supplē!”  
 intremuit rāmīsque sonum sine flāmine mōtīs  
 630 alta dedit quercus: pavidō mihi membra timōre  
 horruerant, stābantque comae; tamen ōscula terrae  
 rōboribusque dedī, nec mē spērāre fatēbar;  
 spērābam tamen atque animō mea vōta fovēbam.  
 nox subit, et cūrīs exercita corpora somnus  
 635 occupat: ante oculōs eadem mihi quercus adesse  
 et rāmīs totidem totidemque animālia rāmīs  
 ferre suīs vīsa est pariterque tremēscere mōtū  
 grāniferumque agmen subiectīs spargere in arvīs;  
 crēscere dēsubitō et maius maiusque vidērī  
 640 ac sē tollere humō rēctōque adsistere truncō  
 et maciem numerumque pedum nigrumque colōrem  
 pōnere et hūmānam membrīs indūcere fōrmam.  
 somnus abit: damnō vigilāns mea vīsa querorque  
 in superīs opīs esse nihil; at in aedibus ingēns  
 645 murmur erat, vōcēsque hominum exaudīre vidēbar  
 iam mihi dēsuētās; dum suspicor hās quoque somnī  
 esse, venit Telamōn properus foribusque reclūsīs  
 “spēque fidēque, pater”, dīxit “maiōra vidēbis:  
 ēgredere!” ēgredior, quālēsque in imāgine somnī  
 650 vīsus eram vīdisse virōs, ex ōrdine tālēs

- adspiciō nōscōque: adeunt rēgemque salūtant.  
vōta Iovī solvō populisque recentibus urbem  
partior et vacuōs prīscīs cultōribus agrōs,  
Myrmidonāsque vocō nec orīgine nōmina fraudō.
- 655 corpora vīdistī; mōrēs, quōs ante gerēbant,  
nunc quoque habent: parcum genus est patiēnsque labōrum  
quaesītique tenāx et quod quaesīta reservet.  
hī tē ad bella parēs annīs animisque sequentur,  
cum primum quī tē fēlīciter attulit eurus’
- 660 (eurus enim attulerat) ‘fuerit mūtātus in austrum.’  
Tālibus atque aliīs longum sermōnibus illī  
inplēvēre diem; lūcīs pars ultima mēnsae  
est data, nox somnīs. iubar aureus extulerat Sōl,  
flābat adhūc eurus reditūraque vēla tenēbat:
- 665 ad Cephalum Pallante satī, cui grandior aetās,  
ad rēgem Cephalus simul et Pallante creātī  
conveniunt, sed adhūc rēgem sopor altus habēbat.  
excipit Aeacidēs illōs in līmine Phōcus;  
nam Telamōn frāterque virōs ad bella legēbant.
- 670 Phōcus in interius spatium pulchrōsque recessūs  
Cēcropidās dūcit, cum quis simul ipse resēdit.  
adspicit Aeolidēn ignōta ex arbore factum  
ferre manū iaculum, cuius fuit aurea cuspis.  
pauca prius mediīs sermōnibus ille locūtus
- 675 ‘sum nemorum studiōsus’ ait ‘caedisque ferīnae;

quā tamen ē silvā teneās hastīle recīsum,  
 iamdūdum dubitō: certē sī fraxinus esset,  
 fulva colōre foret; sī cornus, nōdus inesset.  
 unde sit, ignōrō, sed nōn fōrmōsius istō  
 680 vīdērunt oculī tēlum iaculābile nostrī.’  
 excipit Actaeīs ē frātribus alter et ‘ūsum  
 maiōrem speciē mīrābere’ dīxit ‘in istō.  
 cōnsequitur, quodcumque petit, fortūnaque missum  
 nōn regit, et revolat nūllō referente cruentum.’  
 685 tum vērō iuvenis Nērēius omnia quaerit,  
 cūr sit et unde datum, quis tantī mūneris auctor.  
 quae petit, ille refert, sed enim nārrāre pudōrī est,  
 quā tulerit mercēde; silet tāctusque dolōre  
 coniugis āmissae lacrimīs ita fātur obortīs:  
 690 ‘hoc mē, nāte deā, (quis possit crēdere?) tēlum  
 flēre facit facietque diū, sī vīvere nōbīs  
 fāta diū dederint; hoc mē cum coniuge cārā  
 perdidit: hoc utinam caruissem mūnere semper!  
 ‘Procris erat, sī forte magis pervēnit ad aurēs  
 695 Ōrīthȳīa tuās, raptae soror Ōrīthȳīae,  
 sī faciem mōrēsque velīs cōnferre duārum,  
 dignior ipsa rapī! pater hanc mihi iūnxit Erectheus,  
 hanc mihi iūnxit amor: fēlīx dīcēbar eramque;  
 nōn ita dīs vīsum est, aut nunc quoque forsitan essem.  
 700 alter agēbātur post sacra iugālia mēnsīs,

cum mē cornigerīs tendentem rētia cervīs  
 vertice dē summō semper flōrentis Hymettī  
 lūtea māne videt pulsīs Aurōra tenebrīs  
 invītumque rapit. liceat mihi vēra referre  
 705 pāce deae: quod sit roseō spectābilis ōre,  
 quod teneat lūcīs, teneat cōnfīnia noctis,  
 nectareīs quod alātur aquīs, ego Procrin amābam;  
 pectore Procris erat, Procris mihi semper in ōre.  
 sacra torī coitūsque novōs thalamōsque recentēs  
 710 prīmaque dēserti referēbam foedera lecti:  
 mōta dea est et “siste tuās, ingrāte, querellās;  
 Procrin habē!” dīxit, “quod sī mea prōvida mēns est,  
 nōn habuisse volēs.” mēque illī irāta remīsīt.  
 cum redeō mēcumque deae memorāta retractō,  
 715 esse metus coepīt, nē iūra iugālīa coniūnx  
 nōn bene servāset: faciēs aetāsque iubēbat  
 crēdere adulterium, prohibēbant crēdere mōrēs;  
 sed tamen āfueram, sed et haec erat, unde redībam,  
 crīminis exemplum, sed cūncta timēmus amantēs.  
 720 quaerere, quod doleam, statuō dōnīsque pudīcam  
 sollicitāre fidem; favet huic Aurōra timōrī  
 inmūtātque meam (videor sēnsisse) figūram.  
 Palladiās ineō nōn cognōscendus Athēnās  
 ingrediorque domum; culpā domus ipsa carēbat  
 725 castaque signa dabat dominōque erat ānxia raptō:

vix aditus per mille dolōs ad Erecthida factus.  
 ut vīdī, obstipuī meditātaque paene reliquī  
 temptāmenta fidē; male mē, quīn vērā fatērer,  
 continuī, male, quīn, et oportuit, ōscula ferrem.  
 730 trīstis erat (sed nūlla tamen fōrmōsior illa  
 esse potest trīstī) dēsideriōque dolēbat  
 coniugis abreptī: tū collige, quālis in illā,  
 Phōce, decor fuerit, quam sic dolor ipse decēbat!  
 quid referam, quotiēns temptāmina nostra pudīcī  
 735 reppulerint mōrēs, quotiēns “ego” dīxerit “ūnī  
 servor; ubīcumque est, ūnī mea gaudia servō.”  
 cui nōn ista fidē satis experientia sānō  
 magna foret? nōn sum contentus et in mea pugnō  
 vulnera, dum cēnsūs dare mē prō nocte loquendō  
 740 mūneraque augendō tandem dubitāre coēgī.  
 exclāmō male victor: “adest, mala, fictus adulter!  
 vērus eram coniūnx! mē, perfida, teste tenēris.”  
 illa nihil; tacitō tantummodo victa pudōre  
 īnsidiōsa malō cum coniuge līmina fūgit;  
 745 offēnsāque meī genus omne perōsa virōrum  
 montibus errābat, studiīs operāta Diānae.  
 tum mihi dēsertō violentior ignis ad ossa  
 pervenit: ōrābam veniam et peccāsse fatēbar  
 et potuisse datīs simīlī succumbere culpae  
 750 mē quoque mūneribus, sī mūnera tanta darentur.

haec mihi cōfessō, laesum prius ultra pudōrem,  
 redditur et dulcēs concorditer exigit annōs;  
 dat mihi praetereā, tamquam sē parva dedisset  
 dōna, canem mūnus; quem cum sua trāderet illī  
 755 Cynthia, “currendō superābit” dīxerat “omnēs.”  
 dat simul et iaculum, manibus quod, cernis, habēmus.  
 mūneris alterius quae sit fortūna, requīris?  
 accipe mīrandum: novitāte movēbere factī!  
 ‘Carmina Lāiadēs nōn intellēcta priōrum  
 760 solverat ingeniīs, et praecipitāta iacēbat  
 inmemor ambāgum vātēs obscūra suārum:  
 763 prōtinus Āoniīs inmittitur altera Thēbīs  
 762 [scīlicet alma Themis nec tālia linquit inulta!]  
 764 pestis, et exitiō multī pecorumque suōque  
 rūrigenae pāvēre feram; vīcīna iuventūs  
 vēnimus et lātōs indāgine cīnximus agrōs.  
 illa levī vėlōx superābat rētia saltū  
 summaque trānsībat postārum līna plagārum:  
 cōpula dētrahitur canibus, quās illa sequentēs  
 770 effugit et coetum nōn sēgnior ālite lūdit.  
 poscor et ipse meum cōnsēnsū Laelapa magnō  
 (mūneris hoc nōmen): iamdūdum vincula pugnat  
 exuere ipse sibi colloque morantia tendit.  
 vix bene missus erat, nec iam poterāmus, ubi esset,  
 775 scīre; pedum calidus vestīgia pulvis habēbat,

ipse oculis ēreptus erat: nōn ōcior illō  
 hasta nec excussae contortō verbere glandēs  
 nec Gortȳniacō calamus levis exit ab arcū.  
 collis apex mediī subiectīs inminet arvīs:  
 780 tollor eō capiōque novī spectācula cursūs,  
 quō modo dēprēndī, modo sē subdūcere ab ipsō  
 vulnere vīsa fera est; nec līmite callida rēctō  
 in spatiumque fugit, sed dēcipit ōra sequentis  
 et redit in gŷrum, nē sit suus inpetus hostī:  
 785 inminet hic sequiturque parem similisque tenentī  
 nōn tenet et vānōs exercet in āera morsūs.  
 ad iaculī vertēbar opem; quod dextera lībrat  
 dum mea, dum digitōs āmentīs addere temptō,  
 lūmina dēflexī. revocātaque rūsus eōdem  
 790 rettuleram: mediō (mīrum) duo marmorā campō  
 adspiciō; fugere hoc, illud captāre putārēs.  
 scīlicet invictōs ambō certāmine cursūs  
 esse deus voluit, sī quis deus adfuit illīs.  
 hāctenus, et tacuit; ‘iaculō quod crīmen in ipsō est?’  
 795 Phōcus ait; iaculī sīc crīmina reddidit ille:  
 ‘Gaudia prīncipium nostrī sunt, Phōce, dolōris:  
 illa prius referam. iuvat ō meminisse beātī  
 temporis, Aeacidē, quō prīmōs rīte per annōs  
 coniuge eram fēlīx, fēlīx erat illa marītō.  
 800 mūtua cūra duōs et amor sociālis habēbat,



nec Iovis illa meō thalamōs praeferret amōrī,  
 nec mē quae caperet, nōn sī Venus ipsa venīret,  
 ūlla erat; aequālēs ūrēbant pectora flammae.  
 sōle ferē radiīs feriente cacūmina prīmīs  
 805 vēnātum in silvās iuvenālīter īre solēbam  
 nec mēcum famulī nec equī nec nāribus ācrēs  
 īre canēs nec līna sequī nōdōsa solēbant:  
 tūtus eram iaculō; sed cum satiāta ferīnae  
 dextera caedis erat, repetēbam frīgus et umbrās  
 810 et quae dē gelidīs exībat vallibus aura:  
 aura petēbātur mediō mihi lēnis in aestū,  
 auram exspectābam, requiēs erat illa labōrī.  
 “aura” (recordor enim), “veniās” cantāre solēbam,  
 “mēque iuvēs intrēsque sinūs, grātissima, nostrōs,  
 815 utque facis, relevāre velīs, quibus ūrimur, aestus!”  
 forsitan addiderim (sīc mē mea fāta trahēbant),  
 blanditiās plūrēs et “tū mihi magna voluptās”  
 dīcere sim solitus, “tū mē reficisque fovēsque,  
 tū facis, ut silvās, ut amem loca sōla: meōque  
 820 spīritus iste tuus semper captātur ab ōre.”  
 vōcibus ambiguīs dēceptam praeuit aurem  
 nescio quis nōmenque aurae tam saepe vocātum  
 esse putat nymphae: nympham mihi crēdit amārī.  
 crīminis extemplō fictī temerārius index  
 825 Procrin adit linguāque refert audīta susurrā.

- crēdula rēs amor est: subitō conlāpsa dolōre,  
ut mihi nārrātur, cecidit; longōque refecta  
tempore sē miseram, sē fātī dīxit inīquī  
dēque fidē questa est et crīmine concita vānō,  
830 quod nihil est, metuit, metuit sine corpore nōmen  
et dolet infēlīx velutī dē paelice vērā.  
saepe tamen dubitat spēratque miserrima fallī  
indiciūque fidem negat et, nisi viderit ipsa,  
damnātūra suī nōn est dēlicta marītī.  
835 postera dēpulerant Aurōrae lūmina noctem:  
ēgredior silvamque petō victorque per herbās  
“aura, venī” dīxī “nostrōque medēre labōrī!”  
et subitō gemitūs inter mea verba vidēbar  
nescio quōs audisse; “venī” tamen “optima!” dīcēs  
840 fronde levem rūsus strepitum faciente cadūca  
sum ratus esse feram tēlumque volātile mīsī:  
Procris erat mediōque tenēns in pectore vulnus  
“ei mihi” conclāmat! vōx est ubi cognita fīdae  
coniugis, ad vōcem praeceps āmēnsque cucurrī.  
845 sēmianimem et sparsās foedantem sanguine vestēs  
et sua (mē miserum!) dē vulnere dōna trahentem  
inveniō corpusque meō mihi cārius ulnīs  
mollibus attollō scissāque ā pectore veste  
vulnera saeva ligō cōnorque inhibēre cruōrem  
850 neu mē morte suā scelerātum dēserat, ōrō.

vīribus illa carēns et iam moribunda coēgit  
haec sē pauca loquī: “per nostrī foedera lectī  
perque deōs supplex ōrō superōsque meōsque,  
per sī quid meruī dē tē bene perque manentem  
855 nunc quoque, cum pereō, causam mihi mortis amōrem,  
nē thalamīs Auram patiāre innūbere nostrīs.”  
dīxit, et errōrem tum dēnique nōminis esse  
et sēnsī et docuī. sed quid docuisse iuvābat?  
lābitur, et parvae fugiunt cum sanguine vīrēs,  
860 dumque aliquid spectāre potest, mē spectat et in mē  
īnfēlicem animam nostrōque exhālat in ōre;  
sed vultū meliōre morī sēcūra vidētur.’

Flentibus haec lacrimāns hērōs memorābat, et ecce  
Aeacus ingreditur duplicī cum prōle novōque  
mīlite; quem Cephalus cum fortibus accipit armīs.